

# DEO OPTIMO MAX. UNI ET TRINO,

VIRGINI DEI-PARÆ, ET S. LUCÆ

Orthodoxorum Medicorum Patrono.

## QUÆSTIO MEDICA,

QUODLIBETARIIS DISPUTATIONIBUS,

*manè discutienda in Scholis Medicorum, die Jovis decimâ-  
octavâ Februarii, M. DCC. LXII.*

M. GUIDONE - ANDREA GARNIER,

in insulis Martinicæ & Guadalupix, Consiliario Regis Medico,  
Doctore Medico, Præfide.



*An Medicinæ Castrensis plurimæ Cautiones, pauciora Remedia?*

I.



**U**T non ubique eadem hominum vita, sic & non ubique eadem Medicina. Tam varia enim est hujus ab illius discrimine Ratio, tam multiplex pro diverso loci, temporis, sexûs, ætatis & temperamenti respectu, tam innumera sanitatis & morbi conditio, ut si vè sit illa recuperanda aut conservanda, si vè sit curandus aut palliandus iste, non uno, nec simplici, sed in infinitum penè mutabili more opitulari semper debeat Medicus. Hinc *Ars longa* rectè dicitur, quæ jam tot retrò sæculis exculta, tot immensis evoluta laboribus, tot experientiis aucta, inconcussis etiamnum comperta principiis, nedùm terminatâ consistat legum epitome, novâ semper & inexhaustâ rerum accessione, incrementum quasi quotidie videtur: Adeò multâ semper & semper instabili ratione constat. Procul igitur omnes & nefasti ordinis Medicastri, qui nullâ factâ rerum distinctione, adoptatis tantùm hinc & inde qualibuscumque remedium præscriptionibus, familiarem quamdam & immutabilem sibi Medicinam asciscunt, nec minùs ad hominum perniciem, quàm ad artis opprobrium, errores pessimos, nè dicam lethales, in morborum tractatione delinquant. Liceat ipsius quisquiliarum simplicitatem triumphare, una Medicum decet recti cupido, unum hunc juvat veritatis studium, nec terret labor, nec frangit difficultas: Officii siquidem amplitudinis probè conscius, omnes morborum & naturæ vices, indefessim quantumque est in humanâ mente vestigat, cunctas perpendit causarum varietates, & sic pro singulâ cujusque differentiâ, congruam prophylaxim accommodatam-ve therapeiam impendit. Equabili & nos exultatione ducti

variandam æstimantes pro temporibus & locis medicinam, quæ bello, quæ castris observanda sit, præsentī disputatione proponimus, non nullā subjiçiendo quæ nos aliquantula docuit experientia.

(a) Hipp.  
Op. sect. VIII.

Et si præ dirā hominum sævitā, ad immensum ferè prolentur bellica armorum & fulminum præsidia, quibus Ars se se enecandī hodiernæ perficitur, non tamen hæc tam multas, tam crebras strages edunt, quàm qui exercitibus ingruunt morbi, cū non debitis præcaventur aut curantur cautionibus. Bellantium igitur non minùs interest probus & expertæ industriæ Medicus, qui sævas arceat morborum contagiones, quàm strenuus imperio ductor, qui ab hostium formidine deffendat. Quin ut ipsa divi senis. verba proferam. (a) *Quodnam subsidium male habenti exercitui potius fuerit quam Medicus?* Ast non certè leve huic negotium, cui tantò major requiritur rerum cognitio, tantò solertior in scrutando sagacitas, tantò vigilantior in agendo diligentiā, quod multis simul & occultè conspirantibus undequāque causis, cautus semper respondere debeat. Quot enim ab aëris depravationibus affectiones? Quot ab improbā victūs qualitate, quot à nimis defatigationibus, quot ab immodicis vigiliis, quot à subitis rerum mutationibus, quot ab ipsis animi pathematis, quanta demum à frequentibus & spissis hominum contuberniis, morborum agmina, quæ infestissimā sæpè clade prorumpunt, si non ociùs & opportunè avertantur? Huic ideo non tantum incumbere debet Medicus, ut præsentia mala debellantur, quæ non finè magnā sæpè depopulatione contingunt, sed etiam ut tam multis obversantibus morborum causis, certā quædam adhibeantur obsistendī rationes, quibus tuta firmentur militum corpora & in suā quantum fieri potest incolumitate persistant. Nec verò huic præstando sufficit, si non prò meritis captatā omnium fiduciā, cō exercitūs ducum, ipsiusque imperatoris animos sibi devincat, ut quod ipse consilio ad hominum salutem, isti prò suā quisque authoritate decernant.

# I I.

**U**T ut inter se dissident sanitatis & vitæ pericula quibus obnoxii vivunt qui castra sequuntur, in hoc potissimum sæpè conveniunt quod nativum debilitando corporis robur, ipsamque conturbando fluidorum mixtionem, ferè semper aliquam humorum Sepsim accersant. Dicimus aliquam, ne fortè totalem intelligere audiamur, quæ nunquam nisi cū comitante morte obrepit. Ut autem absit verbis ambiguitas, Sepsim aut Putredinem vocamus motum quemdam fermentatorium, quo mediante principia corporis cujuslibet, pristinā suā commixtione solvuntur, residuo manente alkalino volatili. Porro maximum illius concitamentum & vehiculum est Aër qui rarò aquabili temperie consistens, rarò etiam errabundis innocuus evadit, vel enim nimia siccitate exsorbet, vel inassuerā frigiditate stringit, ut si non semper, saltem quandoque, arefacto aut rigidiori fibrarum elatere, vasculis maximè

coarctentur humores, proindeque ad infarctus & dyscrasiam vergant. Magis autem & scepius nocet humidus, qui laxatâ corporis compage, tantam inde præstat partibus torpedinem, ut fluida impari aut nullâ elaborata actione, non nisi stagnationes & certas sui dissolutiones patiantur. Sed omnium infestissimus est Aër calidus, qui prò intenso suo ardore exiliores fluidioresque dissipando sanguinis partes, ipsum quasi siccet, exhaurit & difficile meabilem reddit, sin quod adhuc pejus est, austribus etiam ventis comitatus, (a) & humido insuper vapore refertus, subita maceratione aut iniquatione inscit. Præterquàm enim aër, calor & humiditas simul conjuncta, certa & sola sunt putredinis concitamenta, nemini non est compertum, temporibus & locis humidis simul & æstuantibus, maximas fieri uberrimasque corporum omnigenorum, tum saniorum cum putrescentium exhalationes, quæ liquidum in aërem sublatae, novoque ibi motu sibi invicem commixtae, putridam semper plus minùsve naturam referunt, nil lena morborum fermenta producant, & sic tantum luis ubiquaque spargunt quantum nebulosis temporibus, maximè occidente die, aut nullo aspirante sole decidunt. *Certe putrefactio vera corporum*, inquit Boerhaavius, (b) *vix aliâ causâ promovetur magis quàm calidi aeris humiditate, quæ brevissimo temporis spatio, penitus in tabum putrefactum corpora cò disposita resolvit, &c.*

(a) Hipp.  
Epid. lib. II.  
& III.

(b) Elema  
chem. T. I.  
p. 253.

Atque ea vis omnis morborum, pestilitalque,  
Aut extrinsecus, ut nubes nebulaeque superne,  
Per coelum veniunt, aut ipsa scepe, coorta,  
De terrâ surgunt, ubi putrorem humida nacta est,  
Intempestivis pluviisque & solibus ista.

Lucret. de rerum naturâ, Lib. VI.

Et si insuper inassuetam aëris temperiem attendamus.

Nonne vides etiam cœli novitate & aquarum,  
Tentari, procul à patriâ quicumque domoque,  
Adveniunt, ideo quia longè discrepat aër.

Ibidem,

Quantacumque verò sint quæ ab aëre insidiantur causæ, iis certè proximè accedit, quæ à pravâ cibi & potus conditione oritur, in quantum vel malè humoribus inquilinis assimilati, vel vitiatâ quadam indole affecti, chylum impurum, fecinum efformant, qui facili suâ sponte putrescit. *Partes enim redundantes quot quot non convertuntur in sanguinem & in membris remanent, putrescunt; undè fit ut tandem generetur anthrax pestilens, variola, &c.* (c) Singulare hujus veritatis exemplum prostat in Secalauniâ, quæ cum maximâ semper secalium segete abundet, nonnulla interdum aded corrupta producit, ut à longâ eorum comestione, partes aut membra coporis, nasus scilicet, digitus, pes, manus-ve suborâ gangrenâ scepius collabantur, nullâ præcedente febris aut inflam.

(c) Galen.  
de usu memb.  
Tract. IX.

(d) *Vid. Com. ment. Acad. Scient. Paris. anno, 1676. Lettre de M. Doilart, sur le bled ergoté.*

(e) Boheraav. luv. ii.

(f) Pringle, *Maladies des Arm. 2e. part. Chap. II.*  
Strack tent. Med. de dysenteria, p. 13.

matione, sed prævio tantum tumore quodam dolente. (d) Nec parum etiam faciunt defatigationes, vigiliæ, quæ labefactato imprimis solidorum systemate, brevi totam œconomiam animalem diruunt, ut nullam amplius vi, nullo organico robore constans, obvium quemque morbum facilius admitat: Mutatio autem subita à consuetis in nova, vix non est semper periculosa, quæ contractam vitæ consuetudinem subito pervertens, insitam corpori idiosyncrasiam, (e) necessario perturbat & ad morbum disponit. Anxiæ præterea & multæ sunt animi affectiones à quibus proximum sæpè imminet vitæ periculum, proût infirmato cerebri tenore, magis minus-vè afficiuntur aut exinaniantur nervi, læduntur functiones & impeditur nutritio. Sed hæc etiam omnia vix epidemiis ansum darent, si non insuper adesset maxima contagii ratio, quæ scilicet, contuberniorum causâ, (f) coacervatim ut plurimum collecti milites, cazulis, tentoriis, navibus, nosocomiis-vè aut carceribus interclusum aërem, tetrâ excrementorum perspiratione corrumpunt, & sic ut ut pauci ægrescunt, viâ anhelationis non minus quam contactus, suos sæpè contubernales ingentia sibi lue infestant. Paret itaque ex putrefactione præcipuam deducendam esse, morborum castrensis Æthiologiam, adeoque potissimam eam esse Medici Castrensis operam, ut apprimè noscat quâ causâ, quo modo, quâ tandem diversâ facie generetur tanta illa malorum labes, ut ipsam possit optimâ ratione debellare; sed cum ea vix forent longissimâ tractatione discutienda, paucis tantum, rem aggrediemur.

# P I I.

**N**Æ toto cœlo errant illi qui Alkalina volatilia tanquam proximam putredinis causam agnoscunt, cum huic illa maximè adveniant. Non sunt enim putrida quæ putredini residua super sunt, sed quæ in ipso adhuc putredinis motu versantur; talia sunt, quæ Alkalescentia potius dixerim, corporum putrescentium miasmata, quæ si per cutis poros aut pulmonum inspirationem, nudo sanguini quantulumcùmque immisceantur, brevi tota ejus massa gradatâ fermentatione corripitur, tumescit moles, vasa distenduntur, crebrescit pulsus, *minimâ tandem scintilla in latè depopulans crescit incendium*, (a) & sic ipsa sæpissimè suscitatur febris, quæ pro majori aut minori luxuriantis fermenti pollentia, pro tali vel tali fibrarum dispositione, gravius aut levius afficit, sævit exacerbat, usquedum humores, vel felici naturæ molimine defecunt, vel solutâ partium integritate putrescant. Hujus verò proximæ fermentationis diagnosim non malè perhibent nausæ, vomitiones, cardialgia, pandiculationes, corporis anxietas, torpor, capitis gravitas, sitis magna, oculorum dejectio, pulsus inæqualitas, tanta demum animi viriumque defectio, ut soluta penitus vitæ claustra diceres, si non vividiora mox surgerent symptomata, quibus tandem proprius elucescit morbi genius, adeoque vel Febris prodit diversimoda, vel Plevritis, vel Angina, vel Scorbutus, vel Cholera, vel Diarrhæa, vel Dysenteria,

(a) Boerhaav. de hon. Med. serv. orat.



vel Morbilli, vel Variolæ, vel Pestis, vel alia etiam quælibet specialis aut anomala corporis affectio, prout variè variis partibus dispersitur aut compingitur fermentum.

Quandoquidem istæ Epidemiarum species nil aliud sunt quam totidem Septicæ Luis schemata, ut omnes fermè notant, qui de illis scripserunt Authores, (b) non alia iis videtur impendenda esse Medicina quàm quæ ab Antisepticis desumitur. Hæc verò non tam in remediis quàm in multiplici prophylaxeos ratione consistit, quippè quæ, pro omnibus & singulis causarum varietatibus, diversas exigit permultasque cautiones, quas prout à variis hygiasticis & præcipuè Clarissimo Pringle (c) optime recensitas, enumerare hic consultò omittimus, ne coctam quasi crambem recoquere videamur. Illud tamen per transennam annotare licebit, nullâ aliâ meliùs arte præcaveri aut minui contagionem, quàm munditie magnâ, simplici victu, putrium carniùm abstinentiâ, frequentibus castrorum mutationibus, ventilatis, rarefactis, quantum fieri potest, contuberniis & sedulò adhibita attentione ut siccis, puris, spatiosisque locis stabiliantur nosocomia, atque accuratè inhumentur tum hominum cum brutorum quorumcumque cadavera. Præ cæteris autem maximè commendandi veniunt cibi potusque aciduli, alique antiseptici, ut sunt, Cœpa, Allium, Daucus Sativus, Apium dulce, Brassica, Napus, Liqueores Ardentes, Vinum, Acetum, &c. (d) quæ prò suâ quâ polent stimulant virtute, laxam roborant fibrarum compagem, indeque tam certò putridæ dispositioni obsistunt, tam necessarium præstant corpori tutamentum, ut ex unanimi medicorum sententiâ (e), vix sine aliquo eorum usu, tuta contagio evadat & evadere possit sanitas. Nec possumus Clarissimo Mead non refragari, cum improbat (f) usitatam vulgò, ab ipsoque Hippocrate commendatam, consuetudinem, pestilentialibus contagiis, ignes aperto aëre accendere, ut putrida emendetur atmosphæræ constitutio. Hæc enim ratione non modo aër rarefactus passim agitur & renovatur, sed quatenus est calefactus, etiam exsiccat, & sic suâ quâ nocet humiditate & impurâ colluvie repurgatur. Non igitur benè momentosa videtur ratio, quâ citatus auctor ab aucto calore periculum inducit. (g) Verùm frequentioris sunt utilitatis vapores acidi quicumque, ut v. g. vapor aceti suprà ferrum candens injecti, fumus pulveris sulphurati, vel etiam ipsius sulphuris combusti, ut idem commendat Mead. (h) Sed ut hæc omnia corpus à putredine eripiant non tamen ab anxio animi pathemate defendunt, sunt quippè multi imbelles & novi in arte milites, qui, vel timidâ animi propensione, vel sollicito patriæ desiderio ità molestantur, ut præcipuè flagrante bello, in morbos pessimos sepius incidunt, quorum funestissimus & frequentissimus est ille quem Nostalgiam aut Pothopatridalgiam (i) vocant, ejus symptemata, etiam si non semper eodem typo persistant, eo tamen conveniunt effectu, quod corpus brevi colliquatione aut tabe con-

(b) Pringle, *Maladies des armées.*

Strack tentam. Medic. de dysent.

Degner. de dysent. bilioso-contagiosa.

Mead tract. de peste.

Rhasis de var. & morb.

Sydenh. de morbis epid.

Allion. de miliar.

(c) *Mat. des armées, deuxième partie, chap. III.*

(d) Pringle, *Traité des substances septiques & antiseptiques.*

(e) Pringle, Strack, Degner, Mead,

Sydenh. Rhasis, Allion.

Boerhaav. locis jam citatis.

Portius, lib. alias inepistissimo, de militum sanitatè tuenda.

(f) Traët. de peste 75.

(g) Ibid.

(h) Eodem tract. p. 277.

(i) Swinger, fascic. dissert.

ficiant. Nec huic & cœteris ullam comperimus esse prophylaxim, nisi in attentâ ducum curâ, quâ caveant ne, præter belli incommoda, etiam aliunde anxientur milites & sic præ dirâ mentis ægritudine, ineluctabili tandem corporis labe concidant.

## I V.

**Q**UANTO autem plura requiruntur adversus luem septicam præsidia, tantò pauciora exiguntur ad ejus curationem Remedia. Ubi enim sanguini irrepsit Virus Septicum, id unum videtur Natura intendere, ut inquinati humores perfectâ coctione defecerent, & quâ facilior patet egressus, fœculenta eliminentur. Ast cùm meatus intestinalis omnium sit ferè sordium communis quasi sentina, quâ veluti ex-fugitur quicquid est corpori noxium, hic duplex artis scopus esse debet, ut æquò tenore foveatur vis fibrarum, quâ subigi possit lues, & ut expeditæ teneantur imò provocentur alvi excretiones, quibus liber èjiciendis patefiat exitus. Huic autem primo conveniunt Antiseptica vulgò dicta, inter quæ potissimum præstant Acida; Amara, Salia neutra, Aromata, Camphora, Vinum, Spiritus, Kinakina, & quæcumque Antiscorbuticorum nomine decantantur. (a) Secundo autem optimè sufficiunt Purgantia salina aut amara, vel sola, vel cùm Vomitoriis intermixtè aut alternatim adhibita, ut se fœlicissimo usu expertum fuisse tradit clarissimus Strack in luculentissimo suo tractatu de dysenteria: quanquàm verò sint illa adversus morbos septicos generaliter efficacia, non tamen singulis æqualiter conveniunt; alii siquidem dantur quibus leviora, alii quibus vehementiora congruunt, proindeque tot requiruntur Antiseptica virtutis gradus, quot diversæ numerantur illorum species. Non sunt igitur indiscretim & confusè usitanda, quæ hic promiscuè suademus medicamina, sed sunt usu probata, congrua symptomatis, sincera, simplicia semper eligenda, quæ præsentem morbi indicationem tutò explere videantur. Miserandæ enim tot simplicium connexiones & confusæ miscellanæ, proditricis ignorantia & incertitudinis, (b) quæ nullum ritè modum, nullam distinctè rationem sequuntur. Suppetit itaque pauca, sed certa certis naturæ signis auxilia ministrare, quibus tutò citòque subigatur & expellatur virus. Inter hæc verò signa maximè attendenda sunt, quæ medico veram agendi rationem perhibent, ut sunt quæ vulgò in morbis acutis properandam esse Catharsim designant, lingua scilicet viridis aut biliosa, ut loquitur Hippocrates, & pulsus intermittens. *Lingua per modum vaporis affecta* inquit Ballonius, (c) *purgationem vacuationem que postulat.* & aliàs, (d) *videmus sæpè in principiis morborum, & pulsus intermissionem & inaequalitatem summam, & tamen audacter purgatio instituitur ..... ab oppressione potius est ea infirmitas, proindeque natura deoneranda est, ut recreari possit.* Hoc idem etiam annotavit Ferrein teste Nihell. (e) Cætera signa, brevitaris ergo mitrimus, quæ tamen eo minùs sunt contemnenda, quòd

(a) Pringle.  
Traité des sub-  
stances sept. &  
antisept.

(b) Helmont.  
disposit. mor-  
dern.

(c) Epidem.  
& ephem. lib.  
II in constit.  
zeit. anp. 1775.  
(d) Id. constit.  
autum. ann.  
1777.

(e) Observa-  
tions nouvelles  
sur les exten-  
sions de la  
pulsion des  
veines, p. 92.

coctionum crisiſumque tempora vices & eventus præſignando, prudentem medicum ſemper dirigere debent, ut fidelis miniſter, nihil niſi imperante naturâ moliatur, aut ipſam molientem, nullâ inconſultâ præcipitatione interturbet.

Venæ ſectionem tamenſi tacemus, ut morbis ſepticis minùs tempeſtivam, non negamus tamen quandoque ita præſentis eſſe efficaciz, ut in illâ tota verſetur ſalutis cardo. Nec cuiquam ignotum eſſe putamus ipſam rarò aut frequenter, parcè aut largiter eſſe inſtituendam, pro leviori aut fortiori movendorum reſiſtentiâ, virium validitate, ſymptomatum vehementiâ. Idem de cæteris remediis, eorum uſu, ratione, cautelâ. &c. *Propius eundo, adaptationes cauſarum ubique dant indagantibus intellectum, ignavis autem neglectum.* (f).

(f) Helmont  
Endem.

Quoad morboſos animi affectus, unum duntaxat & promptum mihi videtur eſſe remedium in plenâ ægrorum deſideriis obtemperacione, nec parùm juvat, tùm in iſtis, cùm in aliis morbis magna & ſingularis ergà ægros humanitas, quæ aliunde tantò magis eſt medico neceſſaria, quòd ſinè illâ mancuſ eſt & exoſus, nec ullam planè fiduciam meretur. *Qui enim ergà homines humanum ſe exhibuerit, inquit Hippocrates, (g) is artiſ amore teneri cenſetur.*

(g) Sectione  
i.

#### V.

**H**ÆC ſunt, quæ ad Morborum Caſtrenſium Epidemicam Conſtitutionem decernunt, ratio, uſus & authoritas; alios prætermittimus qui merè adventitii tanquam caſtrenſes propriè reputari non poſſunt, nec indè ad noſtrum propoſitum pertinent; non nunquam tamen evenit, ut illi adventitii etiamque benigniores morbi, deterrimis contagiis anſam præbeant. Dico enim & repeto, ſemper adeſt exercitiſ nec facile emendabilis contuberniorum ratio, quâ unus aut alter agreſcens miles, pauco tempore poteſt calefactum aliundè, aut occluſum aerem foetentibus corporis excrementorum-vè effluviis adulterare, ut hac viâ diſpergatur morbus, qui ſæpè a primigenio diverſus naſcens, diverſus iterum creſcit, ſubrepiſ, uſquedùm ſenſim increbreſcendo, peſtili tandem & epidemicâ naturâ conſiſtat. Hinc videre eſt, quare in epidemicis conſtitutionibus omnes morbi acuti, ferè ſemper graſſantiſ epidemicæ naturam ſumant. imò non rarò videmus putrefactionem ipſam ſubito caſu accidere ſinè manifeſtâ & apparente cauſâ. Erat Adjacii dum ibi degebam, Helvetus quidam miles, juvenis, robuſtus, qui ſeptimâ ab invaſione febris continuæ interibat, nullâ factâ proſuſ in habitu corporis alteratione; poſtridie mortis cum detegeretur Cadaver, teterrimam & gangrænoſam exhalavit mephitim, quæ ita intolerabilis erat, ut illud protinuſ in apertum campum transferri juſſerim, quò minùs explorantes nos inſiceret putor. Verè toto erat ſui diſſimile corpus, ità enim flatibus intumuerat, ut duplo major videretur ejus moles; naribus, ore, auribus emanabat ſanguis; unus erat toto corpore lividuſ & nigricans

color, ab ingenti vasorum cutaneorum dilatatione, nusquam cuti sua inharebat cuticula, sed passim dehiscebat, passim ampullas efformabat liquido sanguine turgentes. Verbo, ubique flatus, foetor & gangræna, si viscera excipias, inter quæ molle exsuctumque præter modum erat Cor, cætera sicut & vasa ampliora etiam si aliundè sana, ita erant sanguine orbata, ut ipsa aqua cui immergebantur & exprimebantur nullo modo tincta foret, adeo totus ad circumferentiam profluisse videbatur Cruor. Nusquam vidi tam promptos, tam singulares putrefactionis effectus, sed licet putredini tanquam maximæ contagiorum causæ cavere intendamus, nolumus tamen hanc ab omni naturæ negotio indiscriminatim expellere, aliqua siquidem est, quæ ad vitæ & sanitatis conservationem maximè requiritur; talis est quæ dissimilia longè corpora ad nostram nutritionem vertit, humoribus nostris assimilât, & rejectis omnibus quæ minùs benè naturæ nostræ conveniunt, cætera in propriam corporis substantiam convertit. (a) Ast hæc prout nobis inquina, imperfecta, exigua, (b) nec in nudo sanguine, sed in canali intestinali confecta, ubi facilis patet foecibus excretio, si regulatim perficiatur, ne dum noceat, corpus reficit & conservat; cùm econtrà, si nobis ab aliundè provenit & sanguini nudo subrepat, pessimos semper concitat effectus, uti castris nimio plus evenire liquet, ubi hostium hostis insensissima, tam multo, tam frequenti agmine insidiatur Sepsis, ut brevè maximos depopuletur Exercitus, si non tam diversâ cautione, quàm specifico medicamine expugnetur.

*Ergò Medicina Castrensi, plurimæ Cautiones, pauciora Remedia.*

## DOMINI DOCTORES DISPUTATURI.

*M. Petrus-Augustus Adet.*

*M. Carolus-Franciscus Theroulde  
de Vallun, Eques.*

*M. Antonius le Camus, Academi-  
arum Regiarum Rupellensis  
& Ambianensis, nec non So-  
cietatis Litteraria Catalaunep-  
sis Socius.*

*M. Petrus Arcelin.*

*M. Jacobus Barbeau du Bouz,*  
Regiæ Scientiarum Academia  
Stockholmiensis & Societatis Re-  
giæ Mompeliensis Socius.

*M. Anna - Carolus Lorry.*

*M. Joannes - Jacobus Messence,*  
Rei barbaria Professor designa-  
tus.

*M. Bernardus-Nicolaus Bertrand.*

*M. Petrus Chevalier.*

Proponerebat Parisiis. SIMON VACHER, Bisuntinus, in Universitate  
Bisuntinâ Doctor Medicus, Saluberrimæ Facultatis Medicinæ Parisiensis Bacca-  
laureus, nec non exercitûs Regii in Insulâ Corsicâ nuper Medicus, Thæseos  
Auctor. A. R. S. H. 1762. A SEXTA AD MERIDIEM.